

Hageo

Síglonan a pasa den nos estudio di e bukinan profétiko di Tèstamènt Bieu. Nos a introdusí diferente profeta ku a profetisá na e nashon nort, Israel: Oseas, Amos i Jonas. Asiria a konkistá e pais aki i a deportá e habitantenan di Israel na aña 722-721 B.C. I kiko a sosodé ku e hendenan di Israel? Hopi di e dies tribu di Israel a kasa ku paganonan (no-hudiu) i a pèrdè nan identidat komo e puebel di Dios.

Nos tambe a introdusí profetanán ku a duna Dios Su mensahe pa ku e nashon hudiu parti sùit, Juda: Isaias, Jeremias, Joel, Mikeas, Habakuk, i Sofonias. Nan a avisá Juda pa bira for di nan piká pa Dios no kastigá nan. Ma Juda tambe a insistí pa sigui den nan piká i a wòrdu konkistá dor di Babilonia. Jerusalèm i e Tèmpel di Dios a wòrdu destruí dor di ehersitonan di Babilonia na aña (586 B.C.).

Pólisa di Impero di Babilonia pa ku nashonnan konkistá tabata pa deportá e habitantenan pa yuda prevení revolushon kontra Babilonia. Pueblo di Juda a wòrdu deportá i plama na diferente sitio na Impero di Babilonia na por lo ménos tres diferente okashon—na añanan 605, 597 i 586 B.C.

Na aña 539 B.C., Siro, rei di Persia a tuma poder di Babilonia. Un aña despues, el a introdusí un otro pólisa pa ku eksiliadonan. Siro a duna libertat na tur eksiliado, i esaki a inkluí e hudiunan. Siro tambe a hasi un deklarashon spesífiko pa ku e hudiunan (Esdras 1:1-4; 6:3-5). Talbes e òrdu aki tabata influensíá òf asta skirbí dor di Daniel.

Ora Siro a duna permit pa e hudiunan regresá na nan tera, mayoria hudiu no a hasi kaso. Hopi hudiu a bira negoshante riku durante eksilio. Nan no tabata ke bandoná nan rikesa i negoshi lukrativo i bai biba bèk na Kanaan. Ei tabata ménos desaroyá i ku ménos oportunitat pa un bon negoshi.

Ma tabatin un grupo di hudiu ku si a regresá na nan tera. E buki di Esdras ta yuda duna e perspektiva históriko pa e eventonan aki. Lo tabata prinsipalmente hudiunan religioso ku a disidi di regresá i hopi di nan talbes no tabatin hopi rekursu finansiero. Nan a hasi e viahe bou guia di Zorobabel na aña 537 B.C. (Probabelmente Sesbasar ta un otro nòmber pa Zorobabel.) Esdras 1:5-2:67 ta konta di e evento aki i ta laga sa ku nan kantidat tabata 42.360 ku 7.337 sirbidó adishonal. Zorobabel, siendo un prens di Juda, a bira nan promé gobernadó.

Ora e hudiunan a yega, e promé kos ku nan a hasi tabata pa traha un altar i ofresé sakrifisionan na sitio di tèmpep na Jerusalèm. Esaki a sosodé e promé dia di e di shete luna. Nan a selebrá e Fiesta di Tabernakelnan i a reintrodusí ofrendanan regular (Esdras 3:1-6). Den e di dos aña i e di dos luna di nan yegada, nan a kuminsá konstruí e tèmpep (Esdras 3:7-13; 5:16). Ora nan a kompletá e fundeshi, nan a pouza pa selebrá. Tabata e ora ei ku e samaritanonan a kuminsá oponé kontra nan i na aña 534 konstrukshon di e tèmpep a stop (Esdras 4:1-5,24).

Trágikamente, e hudiunan a lubidá nan proyekto. Nan a okupá nan mes ku konstrukshon di nan mes kasnan i nan kunukunan.

Siro a muri na aña 529 B.C. Su yu, Cambises a remplas'é te aña 522 ora el a kometé suisidio. Gaumata, un persona ku a pretendé ku e ta ruman chikitu di Cambises a sinta riba

trono. Ma despues di shete luna el a wòrdu asesiná. Debí ku Cambises no tabatin yu, Dario Histaspes (Dario I) a bira rei na aña 521 di e impero.

Dieskuater aña despues di kuminsá konstruí e tèmpe (520 B.C.), tempu ku Zorobabel tabata gobernadó na Jerusalèm i Dario I tabata rei di Impero Media-Persia, Dios a lamta dos profeta, Hageo i Zakarias (Esdras 6:14), pa enkurashá e hudiunan pa sigui konstruí e tèmpe (Esdras 5:1-6:18). E tèmpe a keda kompleta na aña 516-515 B.C.

Beibel ta menshona dos okashon adishonal ku e hudiunan a regresá na e tera ku Dios a primintí Abraham despues di e promé regreso bou giua di Zorobabel. Eseinan tabata bou guia di Esdras na aña 458 B.C. (Esdras 7:1-10:44) i e di tres organisá pa Nehemias (445 B.C.). Ma pa ku e estudio di Hageo i Zakarias, ta e promé viahe ku ta konta.

Den nos estudio di profetanan, mayoria di nan a profetisá promé ku e deportashon di hudiunan a tuma lugá. Solamente dos a profetisá durante e periodo di eksilio: Ezekiel i Daniel. I ministerio di tres profeta tabata despues di eksilio: Hageo, Zakarias i Malakias.

Nos ke dirigí nos atenshon na e promé dos profeta ku tabatin hopi influensia riba e hudiunan ku a kaba di regresá na e Tera Primintí ku e promé grupo bou direkshon di Zorobabel, esta Hageo i Zakarias. Den e kapítulo aki, nos lo pensa tokante e profeta Hageo.

I. OUTOR DI E BUKI

Nifikashon di Hageo (HAGGAI na idioma hebreo) no ta sigur. Normal studiantenan di Beibel ta haña ku e ta nifiká festivo òf festivitat (selebrashon). Talbes e por nifiká mi fiesta. Pusíbelmente el a nase durante un fiesta religioso hudiu, talbes e Pasku hudiu (“Passover”).

Esaki ta un nòmber apropiá pa Hageo, pasobra, en kontraste di otro profetanan, el a gosa un reashon rápidu i positivo pa ku su mensahe. Pesei algun estudiante di Beibel ta yama Hageo “e profeta eksitoso”.

Maske Esdras 3-6 ta duna trasfondo pa buki di Hageo, tòg ta keda hopi punto deskonosí tokante su persona. Di bèrdat, nos sa kasi nada di Hageo. Nos por spekulá so riba diferente punto.

Probabelmente Hageo a nase na Impero di Babilonia durante e koutiverio hudiu. Ma tin estudiante di Beibel ku ta di opinion ku Hageo tabata un di esnan ku a mira e tèmpe original di Salomon (Hageo 2:3) promé ku su destrukshon na aña 586 B.C. Si esei ta e kaso—i no tin prueba den un direkshon mas ku otro—Hageo lo mester tabatin sikiera 80 aña di edat. Ora Hageo i Zakarias ta menshoná den Beibel huntu, nòmber di Hageo ta menshoná promé. Talbes esaki ta demonstrá ku Hageo tabata esun mas grandi den nan dos.

Hageo no a indiká ken su mayornan tabata. Tin un tradishon ku Hageo tabata di e tribu di Levi, i pues un levita. Ma nos no sa esei sigur. Ta probabel ku Hageo tabata un di esnan ku a regresá na e tera di hudiunan bou giua di Zorobabel maske su nòmber no ta inkluí den e lista di nòmbernan (Esdras 1-2).

Maske Beibel no ta menshoná Hageo su ministerio promé ku esaki, tin poko duda ku e tabata aktivo komo profeta tantu promé komo despues di e eventonan aki. Hageo ta yamá un “profeta” (Hageo 1:1,3,12; 2:1,10; Esdras 5:1; 6:14) i “mensahero di SEÑOR” (Hageo 1:13). Ta probabel ku su ministerio kulminante tabata esun deskribí den su buki.

Akun manuskrito antiguo ta indiká ku Hageo i Zakarias tabata outor di diferente salmo. E tradukshon griego di Tèstament Bieu ta indiká ku salmonan 137 i 145-148 tabata skirbí pa nan. E manuskrito latin ta pone salmonan 111 i 145 den e kategoria aki i esun siriako ta lista salmo 125, 126 i 145-147 komo skirbí pa Hageo i Zakarias. Ma talbes nan simpelmente a organisá e salmonan aki pa uso den sirbishinan ku a tuma lugá na tèmpe.

E echu ku Dios a selektá Hageo ta indiká ku e lo tabata un hòMBER deboto. E lo tabata un hòMBER ku ta keda umilde maske e ta vosero pa Dios. Indudabelmente Hageo tabata kargá pasobra e tèmpe no a wòrdu kompletá. Ku frekuensia Dios ta pone un karga riba kurason di un persona promé ku e ta yam’ é pa e ministerio ei.

Dios a usa Hageo pa enkurashá e pueblo hudiu pa rekonstruí e tèmpe apesar di e

obstakulonon ku nan a eksperensiá. Hageo lo tabata un bon oradó, un persona ku abilidad pa motivá hende pa aktua. (Tin hende ku un tremendo mensahe ku no tin abilidad pa komuniká e mensahe. Otronan ta bon oradó ma no tin un mensahe ku ta bal e la pena. En kontraste, Hageo tabatin un mensahe importante i e tabatin abilidad pa komunik'é di tal forma ku hende lo skucha i aktua!)

Hageo ku Zakarias tabata kolega den e ministerio profétiko (Esdras 5:1-2; 6:14). Sin duda, nan dos lo a enkurashá otro den nan ministerio.

Outor di e buki di Hebreonan ta e úniko outor bíbliko ku a sita Hageo. Hebreonan 12:26 ta sita Hageo 2:6.

II. LEKTORNAN DI E BUKI

Despues di e buki di Abdias, e buki di Hageo, ku su 38 versíkulo, ta esun mas kòrtiku di Tèstament Bieu. Maske e ta un buki chikitu, e tin un mensahe importante. Di bèrdat, su mensahe lo a bin na un momentu krusial.

Hageo indudabelmente a skirbi e buki kòrtiku aki pa e hudiunan ku a bolbe for di eksilio bou liderato di Zorobabel i nan desendientenan. Nan tabata hende ku lo a biba den bisendario di Jerusalèm òf na e suidat mes.

III. FECHA DI E BUKI

Dos aña despues ku Siro a duna su dekreto ku eksiliadonan hudiu por regresá na nan tera, e promé grupo a biaha pa Israel i a kuminsá traha ku smak pa rekonstruí e tèmpe. Ma apenas dos aña despues, nan a deskurashá i a stop e konstrukshon.

No ta konosí eksaktamente dikun e hudiunan a stòp e konstrukshon di tèmpe. Ma sin duda un òf mas di e siguiente puntonan a kontribuí na e desanimo. 1) E samaritanonan a menasá e hudiunan ku nan trabou (Esdras 4:1-5,24). Esaki tabata e motibu mas visto, ma ta dudoso ku esaki tabata e úniko motibu. 2) E hudiunan lo a kustumbrá di adorá sin un tèmpe tempu nan tabata den eksilio na Babilonia. Tabata durante e era di eksilio ku hudiunan a introdusí e sistema di snoa. Konsekuentemente nan no a mira e importansia di e tèmpe. 3) Pobresa por a deskurashá nan. Nan no tabatin e rekursonan finansiero pasobra ripetidamente kosecha a bai malu. Esaki lo mester tabata un aviso pa nan. 4) Kisas nan tabata mas interesá pa konstruí nan mes kasnan na lugá di tèmpe. De todo kaso, e hudiunan a hasi nèt nada pa ku konstrukshon di tèmpe pa 16 aña.

Tempu ku Zorobabel tabata gobernadó di Juda i Josué tabata sumosaserdote (Hageo 1:1,13-14; 2:2,21), dos aña despues ku Dario I a bira rei di Impero Media-Persia, Dios a lamta Hageo i Zakarias pa enkurashá e hudiunan pa sigui ku konstrukshon di tèmpe (Esdras 5:1-2). Ningun profeta a aparesé na un momentu mas oportuno. E hudiunan a pone man na obra i a komplet'é pa aña 516 B.C. (Esdras 6:13-15).

Hageo no a laga duda di fecha di su buki. E buki ta kontené kuater sermon, i pa kada sermon Hageo a duna no solamente e aña i luna, ma tambe e dia di e profesia. Di bèrdat, Hageo a duna e fecha sinku biaha.

Fecha di e promé sermon (1:1-11) tabata na aña 2 di rei Dario, luna 6 (Elul segun kalènder hudiu) i dia 1. Dario I a bira rei di Impero Media-Persia na aña 522 B.C. Pues, segun un konteo, Hageo a prediká e promé profesia dia 29 di ougùstùs di aña 520 B.C.

Hageo tambe a duna e fecha ku e hudiunan a sigui konstruí e tèmpe (1:15) komo e mésun aña (aña 2), luna 6 i dia 24, pues na luna di ougùstùs di aña 520 B.C.

E di dos sermon (2:1-9) ta fechá “e di bint'i un dia di e di shete luna” (2:1). Sin duda esaki ta e mésun aña na luna di Tishri, segun kalènder hudiu. Pues esaki ta 17 òktober di aña 520 B.C. Profesia number tres (2:10-19) a tuma lugá na e mésun aña, luna 9 (esta Chislev) i dia 24 (2:10), esta dia 18 desèmber di aña 520 B.C. I Hageo su di kuater predikashi (2:20-23) a sosodé e mésun dia segun 2:20

Pues, Hageo a prediká tur kuater sermon entre ougùstùs i desèmber di aña 520 B.C., den

un periodo di 3 luna i 20 dia pa ser eksakto.

Ma esaki no ta indiká e fecha ku Hageo a skirbi e buki. No ta konosí kuantu tempu por a pasa entre e fecha ku Hageo a prediká e sermonnan i tempu ku el a skirbi nan. Ma ta totalmente lógiko pa asumí ku el a skirbi e buki despues ku el a prediká e sermon (520 B.C.) ma promé ku konstrukshon di tèmpelel a keda kompletá (516-515 B.C.). Pues fecha di skirbimentu di e buki lo ta entre 520 i 516 B.C.

IV. PROPOSITO DI E BUKI

Sin duda Hageo su proposito tabata pa motivá e hudiunan pa kompletá e tèmpelel. Pa logra su meta, el a splika nan ku si nan ke pa Dios restorá i bendishoná nan, nan mester ahustá nan biba na Su prioridatnan. Den otro palabra, nan tin ku pone Dios *promé* den nan bida. I loke ta Su prioridatnan ta Su programa, Su kas, i Su adorashon.

Hageo a sigui muestra ku una bes nan ta pone Dios Su prioridatnan promé, E lo bendishoná nan ku prosperidat, na lugá di e frakaso i pobresa ku nan ta eksperensiá. E buki ta kontradisí e pensamentu ku obra di Dios ta algu di importansia sekundario i mester warda te ora e situashon ekonómiko drecha. Hageo a muestra ku e problemanan ekonómiko ku e hudiunan a eksperensiá di bèrdat tabata Dios Su huisio. Ekonomia lo drecha ora nan ta duna Dios Su prioridat!

V. STRUKTURA I KONTENIDO DI E BUKI

I. PROMÉ SERMON: ENKURASHAMENTU PA REKONSTRUÍ TÈMPELEL - 1:1-15

A. E Sermon Mes - 1:1-11

E predikashi aki ta un spiertamentu pa hasi loke ta prioridat serka Dios, esta kaba konstrukshon di e tèmpelel. E hudiunan a bolbe for di eksilio ku tur bon intenshon pa konstruí e tèmpelel. Ma komo resultado di oposishon di nan enemigunan, nan a bira indiferente i a buta abou. Nan prioridat a bira nan mes interes: drecha nan kasnan (asta kasnan luhoso), èts. Dios a mira tur esei komo ekskusanan i komo resultado, nan no a eksperensiá Dios Su bendishon. Apesar di tur nan esfuersonan, nan no tabata kontentu. Hageo a laga sa ku nan ta falta Dios Su bendishon pa motibu di nan desobedensia. El a presentá Dios Su solushon pa e problemanan ekonómiko den 1:7-8...sigui ku konstrukshon di tèmpelel.

Por bisa ku Hageo a prediká Mateo 6:33 dilanti patras: Si boso *no* buska promé e reino di Dios i Su hustisia, tur e kosnan aki lo *no* wòrdu añadí na boso!

B. E Reakshon pa ku e Sermon - 1:12-15

Ora Hageo a konfrontá e lídernan i pueblo hudiu, nan inmediatamente a reakshoná positivo. Nan a tuma kurashi i 20 dia despues e konstrukshon a kontinuá! Ora nan a sigui traha, Dios a protehá nan (Esdras 5-6). Dios a sigurá nan ku E no ta kontra nan mas (Hageo 1:13; 2:4,19).

II. DI DOS SERMON: GLORIA FUTURO DI E TÈMPELEL - 2:1-9

2:3 - Algun di e hendenan grandi a kòrda e tèmpelel anterior di Salomon ku Nabukodonosor a destruí. Nan a keda hopi desapuntá mirando e tèmpelel nobo, realisando ku e ta laga hopi di deseá kompará ku e tèmpelel anterior (Esdras 3:12).

Pesei Hageo a duna un otro mensahe di Dios...un predikashi enkurashante. El a deklará ku maske e di dos tèmpelel no ta parse masha kos, e lo ta mas glorioso ku e tèmpelel di Salomon (2:9). Tabata e tèmpelel aki ku Herodes e Grandi a restorá. I tabata e tèmpelel aki ku Hesus a onra ku Su presensia.

III. DI TRES SERMON: OBEDENSIA TA RESULTÁ DEN BENDISHON - 2:10-19

Hageo a prediká ku piká ta hasi sakrifisionan i ritonan en bano. Interes propio ta okashoná mal kosecha. Atrobe Dios ta primintí bendishon si ta pon'E promé!

IV. DI KUATER SERMON: PROFESIA DI RESTORASHON DI REINO DI DAVID I DESTRUKSHON DI REINONAN DI MUNDU - 2:20-23

Esaki ta un promesa spesial pa Zorobabel (governador hudiu) tokante su siguridat personal. E sekshon aki tambe ta laga sa ku Dios lo triunfá finalmente.

Dios ta primintí di establese Zorobabel komo mandatario. Notabel ta ku Zorobabel tabata desendiente di David i ta dor di dje ku e Mesias lo bin (Lukas 3:27).

VI. OPSERVASHONAN DI E BUKI

A. HAGEO TABATA DIOS SU MENSAHERO

Binti biaha den un buki tan kòrtiku Hageo a usa e palabranan “(Asina) SEÑOR...ta bisa/deklará” (1:2,5,7,8,9,13; 2:4³,6,7,8,9²,11,13,17,23³). Sinku biaha adishonal el a usa e frase “Palabra di SEÑOR” (1:1,3; 2:1,10,20). Hageo tabata ke impreshoná pueblo di Dios ku esaki ta Dios Su mensahe i ku ta urgente pa obedesé. Ku e palabranan aki, Hageo tambe a pone hopi énfasis mes riba e outoridat supremo di Palabra di Dios, no e importansia di su mes palabranan. El a umiyá su mes pa Señor por ta eksaltá.

B. HAGEO TABATA UN HÒMBER KU A APRESIÁ EKSAKTITUT

Un punto interesante di e buki di Hageo ta ku e outor a skirbi fechanan eksakto en kontraste di otro outorman bíbliko. Seis biaha den su buki chikitu Hageo a duna e fecha (1:1,15; 2:1,10,18,20).

Pusíbelmente Hageo a fiha su atenshon riba un otro fecha hopi importante ku e no a mensioná den e buki...fecha ku e 70 aña di eksilio a kuminsá.

Talbes un di e motibunanan ku e hudianan a stop di konstruí e tèmpele tabata pasobra nan a usa komo ekskusa ku e 70 aña di koutiverio ku a wòrdu profetisá mester pasa promé ku por kompletá konstrukshon di e tèmpele. Ripará “E pueblo aki ta bisa: ‘E tempu no a yega, esta, e tempu pa e kas di SEÑOR wòrdu trahá di nobo.’” (Hageo 1:2).

Segun e pensamentu aki, Ezekiel a duna e fecha *eksakto* ku e 70 aña a kuminsá. “Yu di hende, skirbi fecha di e dia aki, hasié awe mes. Pasobra awe mes rei di Babilonia a rondoná Jerusalèm” (Ezekiel 24:1-2). Ma Hageo a aparesé i a anunsiá *presis* e dia ku e 70 aña a keda kompletá: “Pensa bon for di awor padilanti, for di e di bint’i kuater dia di e di nuebe luna...for di awe padilanti lo Mi bendishoná boso” (Hageo 2:18-19). Den otro palabra, Hageo a komuniká, “Awe e 70 aña di eksilio ta kompletá. Pues, pone boso ekskusa un banda. Man na obra! Ban traha!”

C. HAGEO NO SOLAMENTE A PREDIKÁ, MA E TAMBE A PRAKTIKÁ LOKE EL A PREDIKÁ

Hageo i Zakarias tabata kolega. Zakarias tabata un hende di vishon, mirando tur klase di vishon. En kontraste, Hageo tabata un hòmber sumamente praktiko, nèt loke Zakarias tabatin mester. (Manera Santiago, Hageo a pone énfasis riba akshon. P’e, el a insistí ku spiritualidat lo ta demonstrá dor di akshon. Hageo a igualá inakshon ku piká.

D. HAGEO A STIMA KAS DI DIOS

Dios a usa Moises pa introdusí e tabernakel. E mésun Moises tambe a laga sa ku eventualmente lo tin un lugá permanente unda Dios lo stablese Su nòmber (Deuteronomio 14:23-25; 16:2,11). Despues di añanan, Dios a guia David na e sitio na Jerusalèm (2 Samuel 24:18-25; 1 Kronikanan 21:18-22:1). Salomon a konstruí e tèmpele mas òf ménos na aña 953 B.C.. Nabukkodonosor a destruí 367 aña despues.

Despues di 70 aña den koutiverio, Hageo a prediká ku mester konstruí kas di Dios. Pa Hageo, e tèmpele tabata e punto kardinal. Pakiko tabata asina importante pa rekonstruí e tèmpele? Pa hudianan di e era di ei, e tèmpele tabata e sentro di adorashon di Dios. Sin e tèmpele, nan no por a adorá Dios manera debe ser. Tabatin diferente fiesta, selebrashon, rito, sakrifisio, èts. ku—

segun Dios Su òrdu—a nesesitá un tèmpep.

E tèmpep na Jerusalèm tabata masha importante pa mas ku ún motibu. Tanten ku e tèmpep no tabata funshonal, no tabatin tèmpep den henter mundu unda hende por adorá Dios. Tabata algu serio ku e tèmpep a keda destruí durante e 70 aña ku hudiunan tabata aisla for di nan pais pa motibu di nan piká. Ma ora e koutiverio a kaba, tabata tempu pa konstruí e tèmpep atrobe, anto mas pronto ku ta pusíbel. Sin duda Dios a deseá esei. Ma ora e konstrukshon a para, esei a komuniká ku e Dios di Israel no tabata masha importante. Kòrda tambe ku hende e era ei a midi kon importante un dios tabata dor di e bunitesa di su tèmpep. Kon hudiunan por a deklará ku Jehová ta Kreador di mundu, e Dios supreme, mientras e tèmpep no a wòrdu rekonstruí?

Hageo lo tabata hopi preokupá pa e gloria di Dios i e testimonio ku pueblo di Dios a duna ku nan falta di rekonstruí tèmpep.

Literatura Konsultá

- Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 430-431.
- Baxter, J. Sidlow, *Explore the Book* (Grand Rapids: Zondervan Publishing House, 1960), vol. 4, p. 226-234.
- Benware, Paul N., *Survey of the Old Testament* (Chicago; Moody Press, 1988), p. 228-230.
- Demaray, Donald E., *A Layman's Guide to Our Bible* (Los Angeles: Cowman Publishing Company, 1964), p. 118-119.
- Freemen, Hobart E., *An Introduction to the Old Testament Prophets* (Chicago: Moody Press, 1972), p. 326-332.
- Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 410-415.
- Jensen, Irving L., *Jensen's Survey of the Old Testament* (Chicago: Moody Bible Institute, 1978), p. 453-462.
- McGee, J. Vernon, *Thru the Bible* notes, p. 304-306.
- Mears, Henrietta C., *What the Bible is All About* (Minneapolis: World Wide Publications, 1966), p. 325-328.
- Miller, Adam W., *Brief Introduction to the Old Testament* (Anderson, Indiana, Warner Press, 1964), p. 162.
- Morgan, F. Crossley, *Haggai, A Prophet of Correction and Comfort* (London: Marshall, Morgan & Scott, Ltd.), p. 13-17.
- Wood, Leon J., *The Prophets of Israel* (Grand Rapids: Baker Book House, 1979), p. 365-369.